

SECTION

3

KASA NE NHYEHYEE



KASA NA NO DWUMADZI

Kasa ne Nhyehyee

NYIENYIM

Kasafua biara wɔ kuw a ɔwɔ mu. Ɔfa yi mu no, yebɔhwɛ dem ekuw ahorow no. Ekuw no nye dzin, dzin-tamsi, nyee na nyee-tamsi. Sɛ etse iynom ase a, ɔbɔboa wo ma aatse nkasafua dwumadzi ase yie.

After this section, you should be able to:

- i. Kyekye edzin mu ekuwekuw (dzin pa, dzinhun, dzin a yennhu, dzin a yehu).
- ii. Kyekye dzin-tamsi mu ekuwekuw (oyikyere dzin-tamsi, nkanee dzin-tamsi, su anaa tsebea dzin-tamsi) na wɔdze ye nsentɔw.
- iii. Kyekye nyee mu ekuwekuw kɔ nyee a ɔfa ɔyetsia, nyee a ɔmmfa ɔyetsia na nyee a ɔfa ɔyetsia ebien m.
- iv. Kyekye nyee-tamsi mu ekuwekuw nya nyee-tamsi a ɔkyere nyebɛa, nyee-tamsi a ɔkyere bea, nyee-tamsi a ɔkyere ber na nyee-tamsi a ɔkyere anɔɔɔzen.

Adwentsitsir

- Yetwa no sin dɛ, dzin ye ahyɛnsɛwdze anaa nkasafua a yɛdze ma nyimpa anaa ndzɛmba. Yetum kyekye edzin mu ahorow nya dzin pa, dzinhun, dzin a yɛmmfa enyiwa nnhu, dzin a yehu na yesuo mu a ɔye yie, Nkanee dzin-tamsi so ye dzin-tamsi a ɔkyere dzin bi no dodow. Su anaa tsebea dzin-tamsi ye dza ɔkasa fa dzin anaa dzinhɛananmu bi ho, kyerekyere mbɛ no su anaa ne tsebea tse.
- Asentɔw mu no, nkasaho taa dzi ɔyɛfo dzin a wɔkyerekyere mu anaa wosi no tam no ekyir pɛɛ. Nyee ye nkasafua a ɔkyere dza obi reye anaa tsebea a nyimpa anaa adze bi wɔ mu. Nyee ne nkyekyemu ahorow ebiasa no nye nyee a ɔfa ɔyetsia, nyee a ɔmmfa ɔyetsia na nyee a ɔfa ɔyetsia

ebien. Nyee-tamsi kyerekyere nyee, nyee-tamsi, dzin-tamsi (Yehu iyi wo ye nsentow mu.) na nyee-tamsi afofor bi so mu – Okasa gyegyeegye **dodow**. Nyee-tamsi gu ahorow. Iyinom nye nyebia nyee-tamsi, ber nyee-tamsi, bea nyee-tamsi, anodzen nyee-tamsi, siantsir anaa botae nyee-tamsi, mpen dodow nyee-tamsi na dza okaka ho.

ADZESUA NO ANKASA

Hom ntsena ekuwekuw na hom nkyerew ndzamba a owu skuuldan mu ha du edzin na dza owu paado so du edzin. Afei, hom mfa nkasafua ebien a okyerere atsenka nka skuuldan mu nkasafua na paado dze no mu biara ho. Kuw biara mfa ne nkasafua a okyerewe nto gua. Aso wo nkasafua no nye afofor dze ye per?

Ebenadze nye dzin?

Dzin ye ahyensewdze anaa kasafua a yedze ma nyimpa, mbowa, ndzamba na mbea ahorow. Edzin no bi so gyina ho ma adwenkyere, tsebea anaa atsenka.

Edzin ahorow

Dzin pa

Dzin pa ye ahyensewdze anaa kasafua a yedze ma nyimpa, mbea etsitsir bi, esutsen edzin, abosoom edzin, nda edzin, nkurow edzin na ne nkekaho. Beebiara a yebohu dzin pa no, akyerewaba kесе na yedze hye ase kyere. Mfatoho:

Nyimpa edzin: Kofi, Abenaa, Yaw, Kwamena, Abayaa, Ebo, Afari, Mansa

Nkurow edzin: Simpa, Nkran, Oguaa, Sekunde, Edwumako, Tamale

Mbea etitsir edzin: Kotoka wimuhen gyinabea, Oguaa esuapon, Baba Yara agoprama do

Nda edzin: Kwesida, Dwowda, Benada, Wukuda, Yawda, Fida, Memenda,

Abosoom edzin: Sanda, Kwakwar, Ebow, Esusuow Aketseaba, Obese, Mumu

Esutsen edzin: Pra, Ayensu, Ankobra, Firaw, Densu, Okye

Dzinhun

Dzinhun ye dzin a yedze ma ndzamba, (mbea, mbowa, adwenkyere) a onnka dzin pa ho. Wommfa akyerewamba akese nnhye dzinhun ase gyede ohye asentow ase.

Dzinhun tum fa oyikyere na dzin-tamsi. Mfatoho bi nye buukuu, atser, pon, dan, bɔdambɔ, gyaadze, skuuldan na adze.

Dzin a yemmfa enyiwa nnhu

Iyinom ye nkasafua a ɔda adwenkyere, atsenka anaa tsebea bi a yemmfa hen enyi nnhu naaso ɔwɔ dzin. Iyi gyina hɔ so ma edzin a yennhu, onnyi mfar anaa yenntum nnsuo mu so. Ɔtaa gyina hɔ ma atsenka, adwenkyere. Mfatoho bi nye enyigye, ɔdɔ, awerehow, ayawdzi, nokwar, nyansa na dza ɔkeka ho.

Dzin a yehu na yesuo mu so a ɔye yie

Iyinom ye ndzɛmba bi a ɔwɔ hɔ a yɛdze enyiwa hu na yesuo mu so ma ɔye yie. Dzin a ɔtse dem no ye dza yetum dze hen atsenkadze enum no (honam, asowa, enyiwa, hwen na tɛkyerema) kyere mbre ɔtse. Mfatoho bi nye bobaa, pon, mpa, dɛtse, sanku, kyen, son, nhyiren, eduhuam na dza ɔkeka ho.

Adzesua mu dwumadzi 1

Kyere dzinkuw a nkasafua yinom mu biara wɔ mu. (dzin pa, dzinhun, dzin a yɛdze enyiwa hu na yesuo mu a ɔye yie, dzin a yemmfa enyiwa nnhu, dzin a yesuo mu a ɔnnye yie.) Kyere siantsir a eka dem.

- i. kyerekyerɛnyi
- ii. pon
- iii. ɔdɔ
- iv. Araba
- v. Ansa
- vi. enyigye
- vii. Korye
- viii. Mframa
- ix. Bobaa
- x. dede

Adzesua mu dwumadzi 2

- i. Hom ntsena ekuwekuw, nkekan akenkansɛm a ɔka do yi na hom nkyere dzin nkasafua a ɔwɔ mu no nyinara.

ii. Hon nkyekye edzin a hom nyae no mu nkɔ

**Dzin a yehu na yesuo mu so a ɔye yie, Dzinhun, Dzin pa,
Dzin a yemmfa enyiwa nnhu**

Daadaa Guamu Nserahwe

Bea soronko bi wɔ mo kurom a wɔfrɛ hɔ guamu. Hɔ ye enyigye, na dede, eguadzifo so dzi akɔnaaba wɔ hɔ aber biara. Hɔ ye bea bi a adzetɔfo hyia adzetɔmfo tɔ ndzɛmba ahorow fi hɔn nkyɛn. Dem ndzɛmba yi bi nye nduaba na atododze afɛɛfɛw, atam, mbaduaba na fie ndzɛmba so. Dza erohwehwe wɔ hɔ biara, ibenya bi.

Menye m'ebusuafo kɔ guamu hɔ kedzi gua dapɛn ewiei biara. Aka kakra ma yeedu hɔ a, metse de eguadzifo reyɛ dede; mbrɛ binom repaa hɔn ndzɛmba no na binom so reserɛ abontsewdo.

Adze a m'enyi dzi kan bɔ do nye nduaba na atododze a wɔahyehye no akɔndɔ akɔndɔ demara wɔ apon do. Ekutudɛw, mpuwa a aberber kookɔɔ na borɔsuow akɛse nnye na wɔ hɔ. Iriɛ hɔ ara nye yi, na ndzɛmba yi ne nkahuam no afa wo do. Iyi na opia me ma medze ahokeka kɔtɔ dza mɛpɛ. Afei, yewura atamfo na ntarfo hɔn patamu. Mudu mbrɛ sor ntar afɛɛfɛw, abaeɔfor sekɛɛte na egudzi a ɔtsew gya yerɛyerɛw wɔ no a, munntum nntwa mu. Gyede migyina hwehwe mu tɔ afofor ka dza mowɔ dadaw no ho.

Sɛ yɛkɔ hɛn enyim kakra wɔ gua no mu a, yekodu beebi a wɔtɔn mbaduaba na edwindze ahorow bi tse de ahondze, nsakɔnadze nye adɔfo akyɛdze ahorow. Ndzɛmba ahorow pii a mbofraba dze dzi agor, nya mu esuadze tse de mbaduaba, baluu afɛɛfɛw na dza ɔkeka ho pii wɔ hɔ. Sɛ muhu mbofraba a hɔn enyi gye ndzɛmba no ho no hɔn enyim sereserew no a, nna m'enyi agye papaapa.

Ekyir koraa no, yekodu beebi a wɔtɔn fie ndzɛmba nkotsee no. Ndzɛmba a ɔwɔ hɔ no bi nye gyaadze ndzɛmba, semina ahorow na ndzɛmba ahorow a yɛdze siesie dan mu na efiefi. Ber biara a yɛbɔkɔ guamu no, me maame totɔ ndzɛmba ahorow ma mosoa kɔ fie.

Yerosow do ahwe edzin ahorow bi so.

Ekuwekuw edzin

Iyi ye edzin a yɛdze ma nyimpa, mbowa anaa ndzɛmba bi a wɔye ekuwekuw. Wogyina hɔ ma dodow naaso wɔye edzin a wɔye ankonam. Mfatoho: bɔɔlbɔkuw, adwontokuw, ndowakuw, mfɔtsekuw, nnomakuw na dza ɔkeka ho.

Adzesua mu dwumadzi 3

Hom ntsena beenu beenu. Beenu no mu kor biara nhwehwe ekuwekuw dzin nkasafua enum. Afei, obiara nye ne nyenko no ndzi nkasafua no ho nkitaho.

Hwehwe nsentow a owow ase ha yi mu na kyere de nkasafua a woetwitwa ase no ye dzin a wakan anaa dza a wonnkan.

- Mbofra no fi agodzi baa fie no, wadaa ntsemara.
- Ye ahweyie osiande nsu no mu do
- Nhyiamu no ase no nna aporisifo kaar pii wo ho.
- Hen enyi gye nsu mbodambo akese no ho.
- Kyegyetofo no dze bota papa to ne kyegye no.
- Mbrahyebaguafo baahen na yehia hon ana yeetum agye mbra bi ato mu?
- Mbofraba pii pe merekye naaso Abam dze n'enyi nngye ho.
- Atondze pii wo ho a wodze detse ye.
- Ekuwa na Kobena nyim mbre wosi bo akyen ahorow.
- Okom dodow ntsi, midzii fufu asanka ma.

No korakora no, yetum kye edzin mu ebien nya edzin a yetum kan na edzin a yentum nnkan. Edzin a yetum kan no ye dza yetum kyere no dodow tse de atar, pon, bomframa, kyim, mango, ekutu na dza okeka ho.

MBOBODO NSEMBISA

1. Fa woara wo nkasafua kyere dzin ase.
2. Kyere edzin a ɔwɔ akenkansem a ɔka do yi mu a wɔye;
 - i. Nyimpa edzin
 - ii. Nda edzin
 - iii. Bea tsitsir bi edzin
 - iv. Dzin a wotum kan.

Kofi tuu kwan fii n'ekuraase kor kurow bi a wɔfre no Nkran Benada bi. Nkran ye bea bi a aborɔsan na adan afɛɛfɛw nnye na wɔ hɔ. Kofi n'enyi gyee papaapa osiande nna ɔnnkor kuropɔn mu da. Ɔkor fiadze kese bi mu kɔtotɔ ndzɛmba tse de baage, mpaboa, watse, abɔyamu na ntar pii. Dza ɔye nwanwa nye de, n'enyi anngye mbrɛ nna hɔ asetsena si tse no ho osian ndzɛmba no bo a ɔwɔ sor no ntsi. Iyi maa ɔkaa ntam de ɔnnketsena kurow kese mu ara da.

3. Fa woara wo nkasafua kyerekyere edzin ahorow yinom ase na ma kor biara ho mfatoho ebien. Afei, fa mfatoho a ama no mu biara ye nsentɔw tsiabaa ebiasa na enye w'anyenkofo ndzi ho nkɔmbɔ.
 - i. Dzin a yehu na yesuo mu so a ɔye yie
 - ii. Dzin a yennhu
 - iii. Dzin a yenntum nnkan
 - iv. Ekuwekuw edzin

MBOBODO DWUMADZI NSEMBISA NO HO MBUAE

1. (Nyiano mu bi) Dzin ye ahyensewdze a yedze ma nyimpa, mbea, mbowa, ndzembra na dza okeka ho a etwa hen ho ehyia.
 - i. Nyimpa dzin: Kofi
 - ii. Da dzin: Benada
 - iii. Bea tsitsir bi dzin: Nkran
 - iv. Edzin a wotum kan: kuropon, ekuraase, kurow, adan, fiadze, ndzembra, baage, mpaboa, watse, aboyamu, ntar, bo.

2. Nyiano mu bi
 - i. *Dzin a yehu na yesuo mu so a oye yie:* Oye edzin a yedze ma ndzembra a yehu na yesuo mu a oye yie.
 - ii. *Dzin a yennhu:* Oye edzin a yedze ma ndzembra a yemmfa enyiwa nnhu na yesuo mu so a, onnye yie. Iyinom ye nkasafua a oda adwenkyere, atsenka anaa tsebea bi a yemmfa hen enyi nnhu naaso owo dzin. Iyi gyina ho so ma edzin a onnyi mfar anaa yenntum nnsuo mu so. Otaa gyina ho ma atsenka na adwenkyere. Mfatoho bi nye enyigye, odo, awerehow, ayawdzi, nokwar, nyansa na dza okeka ho.
 - iii. *Dzin a yenntum nnkan:* Oye edzin a yedze ma ndzembra a yenntum nnkyere ano, nnhu no dodow.
 - iv. *Ekuwekuw edzin:* Oye edzin a yedze ma nyimpa, mbowa na ndzembra a wobu mu kor, ye kuw.

Yeesua edzin na edzin ahorow. Afei, hom mma yenhwe dzin-tamsi so.

Ebenadze nye dzin-tamsi?

Hom ntsena ekuwekuw na hom nhwehwe nkasafua a hom dze beka biribi afa dza owo ase ha yi ho.

- i. Wo skuuldan mu
- ii. Wo nyenko pa
- iii. Wo pon
- iv. Mbre wo skuuldan no mu tse

Dzin-tamsi ye nkasafua a yedze kyerekyere dzin bi mu. Osan kyerekyere nyimpa, mbowa na biribi ne tsebea anaa no su. Mfatoho: ahaebun, tuntum, akokɔangoa, fufuw, tsiatsiaba, tsentsen, feefew, futufutu, kese, tsetseaba, awerɛhow, adadaw, nyansanyi, nokwasem na dza ɔkeka ho.

Nsentɔw mu mfatoho bi na ɔwɔ ase ha yi.

- i.** Mepe adan *adadaw*.
- ii.** Banyimba no ye *tsentsen tseatseaba*.
- iii.** Ekuwa ye *nyansanyi sen* no nua banyin no.

Mfatoho (i) mu no, kasafua *dadaw* kyerekyere dan pɔtsee a ɔkasafɔ no pe. (ii) mu no, kasafua *tsentsen* na *tseatseaba* kyere mbrɛ banyimba no, no bɔbew tse. Mfatoho (iii) no so, *nyansanyi* na *sen* kyere de Ekuwa n'adwen mu dɔ kyeɛ banyimba no.

Dzin-tamsi ahorow

Dzin-tamsi gu mu ahorow. No mu etsitsir a yebohwɛ bi nye;

- i.** Oyikyere dzin-tamsi
- ii.** Nkanee dzin-tamsi
- iii.** Su anaa tsebea dzin-tamsi

Oyikyere dzin-tamsi

Oyikyere dzin-tamsi a yetaa dze dzi dwuma wɔ ha bi nye; iynom, no, iyi, 'dem no' da biribi anaa nyimpa bi edzi ma yehu no yie. Mfatoho:

- a.** Kaar yi ye fofor.
- b.** Dem adan no ye maame no nedze.
- c.** Dem dan no ye me papa nedze.
- d.** Ekuwa rotɔ dem adan *ynom*.

Ntotoho dzin-tamsi

Suar sen, krɔn sen, kese sen, kakraba sen, kese sen na dza ɔkeka ho.

Yɛnhwɛ mfatoho yinom wɔ nsentɔw mu. Kasafua *sen* a odzi dzin-tansi no ekyir no na ɔma ntotoho no ba.

- a.** Amba no fufu no *suar sen* Araba nedze no.
- b.** Me ndzɛmba yi ye *kakraba sen* wodze no.
- c.** Dan no ye *kese sen* asɔrdan no.

Nkanee dzin-tamsi

Dem dzin-tamsi yi kyere dzin bi no dodow anaa ne fa bi. Odzi dwuma de dzin-tamsi osiande okyerkyere dzin bi mu ma yehu no dodow anaa ne fa bi. Mfatoho a owɔ nsentɔw mu bi na oka do yi.

- a. Motɔ emo no *bi*.
- b. Monoaa nkyirefuwa *ebien*.
- c. Ohia esikyire *kakra*.
- d. Mbuukuu *beberee* wɔ m'adakaa mu.

Su anaa tsebea dzin-tamsi

Iyi ye dzin-tamsi a okyerkyere biribi no su, tsebea na no bobew. Ma yenhwe mfatoho a owɔ nsentɔw a oka do yi mu no.

- a. Kaar no ye *dadaw*.
- b. Mowɔ buukuu *kakraba* bi.
- c. Edziban no ye *akɔndɔ*.
- d. Muhun hen *kese* bi.

Adzesua mu Dwumadzi

1. Hwe nkasafua a isuae wɔ adzesua yi ahyese no na kyekye mu kɔ Oyikyere dzin-tamsi, Nkanee dzin-tamsi na Su anaa tsebea dzin-tamsi mu na fa mfatoho afofor ka ho.
2. Kenkan akenkansɛm a oka do yi na kyekye dzin-tamsi a owɔ mu no mu kɔ Oyikyere dzin-tamsi, Nkanee dzin-tamsi na Su anaa tsebea dzin-tamsi. Enye esuafo nkaa no ndzi ho nkɔmbɔ.

Ansaana adze rebekye dem da no, nna Alata kuromba nyina aboa hɔn ano de worikehyia hɔn hen. Nna adehye a wɔwɔ mu no nyinara afefa hɔn afadze fufuw a hɔn nan deda famu. Woebehyia de wɔrebɛma ɔhen no afehyiapa. Abakɔsem kyere de, ber tsentsen bi a abesen kɔ no, ɔhen yi ne nana bi a oewu yee adze kese bi boaa amamba no. Dza ɔyee nye de, ber bi a ɔkɔm kese bi sii ma kɔm dzee nyimpa binom a nna wonnyi enyidado biara no, dem panyin no na nna ɔdze ne haban mu edziban fi ekuroba bi a nna ɔben hɔn ase bre hɔn. Iyi maa wosii panyin no ɔhen dze kyere hɔn enyisɔ. Afe biara, nna kuromba no ba ne nkyen bɛma no afehyiapa dze hɔn akyedze bre no, ye amandze dze kaa no ndwuma pa.

De mbre yehu no wɔ mfatoho a ɔwɔ ase ha yi mu no, su anaa atsenka dzin-tamsi taa dzi dzin a ɔkyerɛkyere mu no ekyir wɔ 'ye' nsentɔw mu.

- a. Dan no ye *fɛw*.
- b. Mpuwa no ye *akɔndɔ*.
- c. Ntar yi ye *afofor*.
- d. Dua a muhunii no ye *tsentsen*.

Su anaa tsebea dzin-tamsi yi dzi dzin a ɔkyerɛkyere mu no ekyir pɛɛ wɔ nsemfua na nsentɔw mu.

Mfatoho:

- a. Motɔɔ fie *fɛɛfɛw* bi.
- b. Muhun dua *tsentsen* no.
- c. Me maame tɔɔ watse *fɛɛfɛw* maa me.
- d. Ɔkɔtɔɔ nam *amon* wɔ mpoano.

MBOBƆDO NSEMBISA

1. Kyere ekuw ahorow a dzin-tamsi yinom wɔ mu na fa wo nyiano no to esuafo nkaa no enyim. Afei, hom ekuekuw no mu no, hom nkyere siantsir a hom dze yee nkyekyemu no.
 - i. fɛw
 - ii. tsentsen
 - iii. dɛw
 - iv. akɔndɔ
 - v. fa
 - vi. kɔkɔɔ
 - vii. etsiɔdzenfo
 - viii. bruw
 - ix. nsuinsu
 - x. dɛm
 - xi. no
 - xii. bi/binom

xiii. ebiasa

2. Kenkan dza ɔka do yi yie na yiyi nsembisa a ɔwɔ ase no ano.
 - i. Hwehwe dzin-tamsi a ɔwɔ akenkansem no mu no nyinara.
 - ii. Kyere ekuw a dzin-tamsi no wɔ mu.
 - iii. Fa kuw biara mu dzin-tamsi ebiasa ye nsentɔw.

John tuu kwan kɔree keseraa no nua panyin wɔ kurow kɛse mu. Iyi nye ber a odzi kan a nna ɔrokɔ kuropɔn mu. N'enyi gyee kuropɔn no ho ber a ofi kaar mu sianee no. Dhyee ase de ɔrototo n'enyi hwe adan atsentsen, aborɔn a no mu tsew na mbrɛ nyimpa si dzi akɔnaaba no. Iyi maa no were fir de ɔbɛfrɛ no nuabanyin a ɔrokɔ ne nkyɛn no ma ɔaabɛfa no efi hengyinabea hɔ. Awɛfir mu ara na ɔkae. Oyii no foon dadaw bi wɔ ne baage tuntum bi mu na dhyee ase de ɔrefrɛ no nua no. Ogu do refrɛ no, kaar fufuw bi begyinaa ne nkyɛn. Ntsemara, John kobuee kaar no abow a ɔwɔ enyim no na ɔdze enyigye ketsenaa ase. Dnam de ofi hɔ kɔ no nua ne fie no nnwar ntsi, annkyer na wodurii. John gyee n'ahom wiei no, wɔbrɛɛ no edziban a n'enyi gye ho papaapa ma odzii

Ebenadze nye Nyee?

Dwuma ahorow ben na dzii no anapa yi? Kyerew dwuma ahorow a idzii no.

Adwen ben na ewɔ wɔ adzesuadze a isua wɔ skuul no ho? Kyerew dem adwen ahorow a ewɔ no.

Ka dza akyerew no nyina kyere esuafo nkaa no.

Nyee ye dwuma a obi dzi anaa ndzeyee bi a ɔkɔ do wɔ ber bi mu. Nyee binom kyere tsebea a obi anaa biribi wɔ mu anaa atsenka a obi nya. Mfatoho: dɔ, nyin, kyir, pɛ, tan, suar, so, nyim.

Nyee tum de ɔfa ɔyetsia anaa ɔmmfa ɔyetsia wɔ asentɔw mu. Dem ɔyetsia yi a ɔtaa ba nyee no ekyir wɔ nsentɔw mu no ma yehu nyee ahorow ebiasa. Iyinom nye nyee a otum fa ɔyetsia, nyee a ɔmmfa ɔyetsia na nyee a ɔfa ɔyetsia pɔtsee na ɔgyefo.

Nyee a wɔfa ɔyetsia

Dem nyee yi fa dzin dzi hɔn ekyir pɛɛ wɔ nsentɔw mu. Mfatoho: noa, hor, twutwuw, bor,

Yenhwe iyinom wɔ nsentɔw a ɔka do yi mu.

1. Me maame *noa* emo.
2. Abofra no *hor* ne ntar Memenda biara.
3. Anapa biara, Abayaa *twutwuw* kyense ho.
4. Esuafo no *dzi* nkombɔ dodow.
5. Banyin no *bor* esutsen no ewimbir biara.

Nkasafua a akyeakyea no nyina ye nyee a wɔfa ɔyetsia. Ɔyetsia no dzi nyee no ekyir pɛɛ tse de **emo** a odzi nyee **noa** ekyir pɛɛ wɔ mfatoho (1) mu no. Kasafua **esutsen** so ye ɔyetsia a odzi nyee **bor** ekyir pɛɛ wɔ mfatoho (5) mu.

Nyee a wɔmmfa ɔyetsia

Ɖem nyee yinom nnhia ɔyetsia ana hɔn ntsease ada edzi. Wotum fa nkasafua anaa nsemfua bi dzi hɔn ekyir naaso wɔnnye ɔyetsia mbom wɔye nyee-tamsi. Mfatoho: heram, tu, nyin, so, yar,

1. Abofra no *heram*.
2. Ekoo no *tu* faa.
3. Abofra no *yar*.
4. Kyense no *so* papaapa.

Nkasafua a wɔakyeakyea hɔn no ye nyee a wɔmmfa ɔyetsia ana hɔn ntseasee ada edzi. Kasafua **faa** a odzi nyee **tu** ekyir no nnye ɔyetsia mbom nyee-tamsi a. Mfatoho (4) mu so kasafua **papaapa** a odzi nyee **so** ekyir no ye nyee-tamsi. Yɛbɔhwe Nyee-tamsi ho adzesua ekyir yi.

Nyee a wɔfa ɔyetsia pɔtsee na ɔgyefo

Ɖem nyee yinom fa ɔyetsia ebien a kor ye ɔyetsia pɔtsee na kor so ye ɔgyefo. Ɔyetsia pɔtsee no nye dzin anaa dzinhyɛanamu a nyee no, no dwumadzi no tsia no pɔtsee. Ɔgyefo no ye dzin anaa dzinhyɛananmu a ɔtɔ do ebien no. Nyee a wɔtaa dzi dwuma wɔ ha bi nye ku, gye, ma, kye, fir, fɛm. Ɔtɔfabi a, kasafua **ma** na ɔda ɔgyefo no edzi.

Mfatoho a ɔwɔ nsentɔw mu:

1. Papa no ku **akrantse** ma *maame no*.
2. Asɔrmba no kye *Sɔfo* no **ndzɛmba**.
3. Kyerɛkyerɛnyi no pam **ewifo** no ma *hɛn*.
4. Kofi fɛm *me* **buukuu**.

Mfatoho (1) mu no, ɔyetsia ebien no nye **akrantse** na **maame no**. Ɔyetsia pɔtsee no nye **akrantse** na ɔgyefo no nye **maame no**. Kasafua ‘ma’ na ɔda ɔgyefo no edzi. Mfatoho (4) mu no, ɔyetsia pɔtsee no nye **buukuu** na ɔgyefo no nye **me**.

Adzesua mu Dwumadzi 1

1. Fa woara wo nkasafua kyere nyee ase?
2. Kyere nyee nkyekyemu ahorow ebiasa no mu tsiabaa.
3. Hwe pon a ɔwɔ ase ha yi do na kyere nyee a ɔwɔ ho no mbre biara wɔ; de wɔye dza wɔfa ɔyetsia, dza ɔmmfa ɔyetsia anaa dza ɔfa ɔyetsia pɔtsee na ɔgyefo.

Nyee	Nyee a ɔfa ɔyetsia	Nyee a ɔmmfa ɔyetsia	Nyee a ɔfa ɔyetsia pɔtsee na ɔgyefo
So			
Ku			
Noa			
Kye			
Hor			
Twutwuw			
Heram			
Pam			
Tu			
Yar			
Fem			

Adzesua mu Dwumadzi 2

Enye wo nyenko nkenkan dza ɔwɔ ase ha yi. Afei, hom nkyekye nyee a ɔwɔ mu no mu nkɔ nyee a ɔfa ɔyetsia, dza ɔmmfa ɔyetsia anaa dza ɔfa ɔyetsia pɔtsee na ɔgyefo. Hom wie a, hom mfa nyee no mu enum nye nsentɔw.

Mfatoho: Akataasia no boor esutsen no k̄r n'egya.

Ofi esutsen no ano dze k̄r n'egya no nnwar biara naaso nna nkye mep̄e de muboguar nsu a no mu d̄o na ɔye kr̄ngyenn ak̄o ek̄yir. Nna bea no kyere mbre ndenkyem w̄o. Mereye ahoboa ebese esutsen no mu no, medze me se suo mo tur no mu. Mob̄o mpaa huruwii t̄o nsu no mu boor de mbreana murusua abor. Nna esutsen no mmpram dzendzen biara na no mu so ye hyew kakra dze naaso nna hu aka me ntsi munntum mmbor yie. Moboree dur nsu no finimfin no, awerefir mu ara na nsu no weew kakra ma mo koko kepeem detsebo bi. Modween de denkyem a ma me yamu hyee me. Iyi maa itur no fii m'ano t̄o esutsen no mu. Mesanee k̄r mbre h̄o d̄o bio. M'enyi baa moho do no nna mabor etwa esutsen edu n'egya. Medze ahopopo toow moho too nsu no egya h̄o. Biribiara baa ewiei naaso mohweer mo tur no

Ebenadze nye nyee-tamsi?

Hwe mfonyin a ɔw̄o ase ha yi.

Kwan ben do na mberantse no fa tu mbirika no?

Ber ben mu na worutu mbirirka no?

Henfa na worutu mbirika no? Ebenadze ntsi na worutu mbirika no?



Nyee-tamsi ye nkasafua anaa nsɛmfua a w̄kyerek̄yere nyee mu ma ntsease da edzi yie. Nyee-tamsi tum kyerek̄yere ne nyenko nyee-tamsi so mu. Dwendwen mbre isii nantsewee baa skuul nde ho. Enantseew ntsentem anaa bereww? Obi nantsew bereww na obi so nantsew ntsentsem. Nkasafua **bereww** na **ntsentsem** kyere mbre nyee *nantsew* si k̄o do ntsi ebien no mu biara ye nyee-tamsi.

Yegyina mbre nyee-tamsi si kyerekyere nyee mu no do kyekye mu. Iyinom nye nyee-tamsi a okyere ber, nyee-tamsi a okyere bea, nyee-tamsi a okyere nyebra, nyee-tamsi a okyere anodzen, nyee-tamsi a okyere mpen dodow, nyee-tamsi a okyere siantsir na dza okoka ho.

Nyee-tamsi a okyere nyebra

Dem nyee-tamsi yinom kyere mbre nyee anaa dwumadzi bi si ko do. Mfatoho bi na owon nsentow mu won ase ha yi.

1. Skuulnyi no nantseew **ntsentsem** kor skuul.
2. Asoramba no bow mpaa **dedeede**.
3. Adwontofa no toow ndwom no **bowow**.
4. Megyee ohoho no **few do**.

Nyee-tamsi a okyere bea

Iyi ye nyee-tamsi a okyere bea potsee a nyee bi ko do won.

Hom mma yenhwe mfatoho a owon ase ha yi.

1. Esuafo no gyina *paado ho*.
2. Takyiwa na Aba da *piamu*.
3. Omuo de edze wura bepetse *bebiara kaka*.

Nyee-tamsi a okyere ber

Dem nyee-tamsi yi kasa fa ber a nyee no ko do anaa kor do ho. Hom mma yenhwe mfatoho bi won nsentow yinom mu.

1. Skuulfo no kyereew nsowhe no *ndeda*.
2. *Nde*, yebedzi hen edziban no ntsem.
3. *Wobow ndonsuon* a, yebeye nhyiamu.

Nyee-tamsi a okyere mpen dodow

Iyi ye nyee-tamsi a oma yehu mpen dodow a ndzeyee anaa dwumadzi bi ko do. Mpen pii no, oba nkasafua ewiei. Mfatoho: afeafe, dapen dapen, da, ntaataado, pen,

1. M'awofo mona me sika *ntaataado*.
2. Araba enya akyedze *da*.
3. Oba ha *afeafe*.
4. Kofi dze, *afeafe* na oba ha.

Mfatoho yi mu no, nkasafua *ntaataado*, *da* na *afeafe* mu biara ye nyee-tamsi a ɔkyere mpen dodow a nyee bi kɔ do. Afei, no mu biara wɔ nsentɔw no ewiei gyede (4) mu a yehu *afeafe* wɔ finimfin.

Nyee-tamsi a ɔkyere siantsir anaa botae

Dem nyee-tamsi yinom ma yehu siantsir a dwumadzi bi kɔ do anaa dza ɔnam do ma dwumadzi bi kɔ do anaa kɔr do. Mfatoho wɔ nsentɔw mu bi nye;

1. *Mennsua adze yie ntsi* menndzi konyim wɔ nsɔhwɛ no mu.
2. *Abofra no bu adze ntsi* obiara pɛ n'asɛm.
3. *Murusua adze yie ama meedzi* konyim.
4. Gye maame no ne ndzɛmba no *ma ɔngye n'ahom kakra*.

Mfatoho yinom mu no, nsɛm a wɔakyerɛw akyeakyea no no nye nyee-tamsi a ɔkyere siantsir anaa botae. Ɔtofabi a, n'egyinahyɛdze nye **ama** anaa **ma**.

Nyee-tamsi a ɔkyere anɔɔzen

Dem nyee-tamsi yi ma yehu nyee a ɔrekyerekyere mu no n'anɔɔzen. Nyee bi n'ano ne dzen tum kɔ sor anaa dɛ ɔba famu.

1. *Apaafɔ no yɛɛ edwuma no demara*.
2. *Atar no atsetsew pasapasa*.
3. *Odzii hia buruburoo*

Adzesua mu Dwumadzi 1

Kaakaa adzesua yi n'ahyɛse dwumadzi no ho. Sesei dze, mususu dɛ enya nyee-tamsi a edze bekyerekyere nyee a ɔrokɔ do wɔ mfonyin no mu no mu. Kyekye nyee-tamsi a esua no mu kɔ ekuw ahorow no mu. Afei, beenu biara mfa nyee-tamsi a ɔfata nye nsentɔw mfa mfonyin no ho.

Adzesua mu Dwumadzi 2

1. Kyere nsorsoree a ɔwɔ nyee na nyee-tamsi mu na kyerekyere mu kyere esuafo nkaa no.
2. Kyerekyere nyee-tamsi ahorow no mu na ma kor biara no mfatoho ebiasa.
3. Fa mfatoho a ɔwɔ 2 no mu ebien ebien ye nsentɔw.

4. Kyekye nyee-tamsi a ɔwɔ ase ha yi mu kɔ ekuw ahorow no mu na kyere siantsir a ekyekye mu dem.
- i. Ntsentsem
 - ii. Fefɛfɛw
 - iii. Ndeda
 - iv. Da
 - v. Bɔkɔɔ
 - vi. Afeafe
 - vii. Anadwe
 - viii. Mprensa
 - ix. Buruburoo
 - x. mfedaa

Adzesua mu Dwumadzi 3

Kenka nsentɔw a odzidzi do yi na kyere nyee-tamsi a ɔwɔ kor biara mu. Afei, fa no mu beye enum ye nsentɔw na kenkan kyere esuafo nkaa no.

1. Esuafo no kenkanee faa do mpɛn pii.
2. Foon no yee dede ntaataado.
3. Nkorɔfo no kɔ paado.
4. Matse dem anansesem yi pɛn.
5. Memmbaa ha da.
6. Sua adze yie ama eedzi konyim wɔ nsɔhwe no mu.
7. Abofra no fɛr adze papaapa.
8. Obu adze ntsi obiara pɛ n'asem.
9. ɔbaa ha anapa yi.
10. Aberwa no nantsew berɛww.
11. Nnoma tu faa.
12. Mbofra no kɔ skuul da biara.
13. Abofra no kɔr hɔ.
14. Nhyiamu no kɔr do wɔ Nkran.
15. Wotuu no fo de mma ɔnnye n'adze efuraado.

MBOBODO NSEMBISA

Ɔfa A: Nyee

1. Soronko ben na ɔwɔ nyee a ɔkyere ndzeyee na nyee a ɔkyere tsebea anaa su mu?
2. Hwehwe nyee a ɔwɔ akenkansɛm yi mu na fa toto wo nyenko nedze ho.
Medze ahoɔhar kɔr mpoano hɔ no, mutuu mbirika huruhuruwii na midzii agor wɔ asorekye no mu. Ewia bɔɔ dzendzenndzen ma ɔhyew baa mo wer mu ntsi m'ahom kaa moho. Muguaar po na midzii agor wɔ nsu no mu ber a nna medze enyigye mereserew. Nsunoma etu nenam nsu no enyi a wɔbobɔ hɔn ntsaban mu. Medze anhwea sii dan na medze mpoano mbobaa hyɛnhyɛn na abon siesiee dan no ho. yee kakra no, mutuu mpasar wɔ mpoano hɔ kakra. Afei, nna morohwehwe biribi wɔ hɔ a ɔbɛma makaa hɔ afebɔɔ.
3. Kyekye nyee a inyae no mu kɔ ekuw ahorow no mu.

Ɔfa B: Nyee-tamsi

1. Kyere dwuma ahorow a idzi no da biara, ber a idzi, mbre isi dzi na siantsir a idzi dem dwuma no.
2. Bobɔ nyee-tamsi a wo nyenko dze dzii dwuma no nyina edzin na kyere kuw a kor biara wɔ mu.
3. Fa nkasafua beye eduonum (50) kyerew nsem fa nkorɔfo a enye hɔn tse na wimu nsakyeree a ɔwɔ hɔ ho.

EXTENDED READING

Adomako, K., Odoom, J. and Sackitey, M. (2023). *Akan kasa nyehyee wɔ Asante Twi mu*. Adonai Publications Limited (Topic on verbs, nouns and adjectives)

Amegashie, S.K. (2004). *Evegbe ɛnɛlɔ*. Victus Printing Services.

Fromkin, V. & Rodman, R. & Hyams, N. (2007). *Introduction to Language* (Eighth edition). Thomson Wadsworth. (topic on verbs, adverbs, nouns and adjectives)

Joshi, M. (2021). *Nouns in the English Language: Types and examples*. Manik Joshi. (Topic on nouns)

Thakur, D. (1998). *Linguistics simplified: Syntax*. Bharati Bhawan. (open word class which are nouns adjectives, verbs and adverbs)

REFERENCES

Haspelmath, M. (2001). Word classes and parts of speech. *In International Encyclopedia of the Social and Behavioral Sciences* (pp16538-16545). Doi:10.1016/Bo-08-043076-7/02959-4

Lier, E. V. (2024). *The Oxford Handbook of Word Classes*. Oxford University Press.

Miguel, J. M. G. (2015). *Transitivity and word classes*. <https://doi.org/10.1075/ivitra.9.13gar>

Prempeh, A. A. (2021). *Asante Twi Nyansapo*. Premesco Publications.

Simone, R. & Masini, F. (eds). (2014). *Word classes (Current Issues in Linguistic Theory)*. John Benjamins Publishing Company.

ACKNOWLEDGEMENTS



Ghana Education Service (GES)

